
**ԱՐԵՎՄՏԱՀԱՅԵՐԻ ԱԶԳԱՅԻՆ
ԺՈՂՈՎԻ ՀՈԳԵՎՈՐ ԳՈՐԾԱՌՈՒՑԹՆԵՐԸ**

ՆՈՒՐԲԵԿՅԱՆ Լ. Զ.

Արևմտահայերի Ազգային սահմանադրությունը (1863 թ.) հայ իրավաբաղադրական մտքի բացառիկ հուշարձաններից է, որն առաջին հերթին արժևորվում է որպես ազգային ինքնակառավարման կազմակերպման, ամրապնդման և իրականացման իրավական ձև:

Ազգային սահմանադրությամբ օրենսդիր իշխանություն հանդիսացող Ազգային ընդհանուր ժողովի հոգևոր գործառույթներից էին Կ. Պոլսի պատրիարքի, Կրոնական ժողովի և նրանց կողմից ձևավորված մարմինների գործունեության վերահսկողությունը, ազգային-հոգևոր մարմինների գործունեության կանոնակարգումը, Ամենայն հայոց կաթողիկոսի ընտրությունների մասնակցությունը, Երուսաղեմի միաբանության, Աղթամարի և Կիլիկիայի կաթողիկոսությունների շուրջն ստեղծված խնդիրների լուծման փորձերը:

Ազգային ինքնակառավարման համակարգում ուրույն տեղ էր զբաղեցնում պատրիարքը, որն Ազգային ժողովի նախագահն էր, գործադիր իշխանության գլուխը և միջնորդը հայության և օսմանյան պետության միջև¹: Պատրիարքի պարտականությունն էր գործել սահմանադրության սկզբունքներին համապատասխան և հսկել նրա բոլոր հոդվածների ճշգրիտ գործադրմանը: Ազգային ժողովի ատենադրությունների ուսումնասիրությունը ցույց է տալիս, որ Ազգային ժողովի օրակարգում հայտնված խնդիրների հասարակական հնչեղությունը որոշ դեպքերում պայմանավորված է եղել ոչ միայն ժամանակի քաղաքական զարգացումներով, այլև Կ. Պոլսի պատրիարքների անձնական հատկություններով, Բ. Դոնան նկատմամբ ունեցած նրանց վերաբերմունքով:

Արևմտահայության համար կենսական հարցերը հիմնականում բարձրացվել են Մկրտիչ Խրիմյանի և Ներսես Վարժապետյանի պատրիարքության շրջանում: Մասնավորապես Մ. Խրիմյանի պատրիարքության ժամանակ (1869-1873 թթ.) Ազգային ժողովի օրակարգում դրվում են սահմանադրության մեջ փոփոխություններ կատարելու, գավառական հարստահարությունների, ինչպես նաև Կիլիկիայի և Աղթամարի կաթողիկոսությունների, Երուսաղեմի միաբանության հարցերը: Ազգային վարչությունը կազմում է նաև այսպես կոչված «Սահմանադրական հրահանգը» փաստաթուղթը, որով որոշակիություն էր մտցվում գավառական ընդհանուր ժողովների, գավառական վարչության, թաղական խորհուրդների կազմության ձևերի մեջ, ինչպես և տեղական օսմանյան իշխանությունների հետ առաջնորդների և գավառական ժողովների հարաբերությունների ընթացակարգում²:

¹ Տե՛ս Ազգային Սահմանադրութիւն Հայոց, Կ. Պոլիս, 1863, էջ 13:

² Տե՛ս Հրահանգ յարաբերութեան առաջնորդաց եւ գաւառական վարչութեանց ընդ տեղական կառավարութեան, Կ. Պոլիս, 1873, էջ 6-9:

Մ. Խրիմյանին հաջորդած Ներսես արքեպիսկոպոս Վարժապետյանը (1874-1884 թթ.) բացառիկ համակրանք և ժողովրդականություն վայելող այն հայրենասեր եկեղեցականներից էր, որն իր խորաթափանցությամբ, հեռատեսությամբ և անհողդողդ կամքով մեծ դեր ունեցավ արևմտահայության կյանքում: Իր պատրիարքության հենց սկզբից Ն. Վարժապետյանը ձեռնամուխ է լինում արևմտահայ Ազգային ժողովն աշխատունակ դարձնելու գործընթացին: Ն. Վարժապետյանն ակտիվ գործունեություն է ծավալում նաև Հայկական հարցի բարձրագույն շրջանում, ինչն էլ ավելի հեղինակավոր և հայտնի է դարձնում նրան: Եվ պատահական չէր, որ 1884 թվականին նա Էջմիածնում ընտրվում է Ամենայն հայոց կաթողիկոս, սակայն վատառողջ լինելու պատճառով հրաժարվում է զբաղեցնել այդ բարձրաստիճան հոգևոր պաշտոնը: Մեծ է Ն. Վարժապետյանի ներդրումը նաև կրթության ոլորտում: Նրա օրհնությամբ և համաձայնությամբ ստեղծվում է «Միացյալ ընկերությունք հայոց»-ը, որը, ունենալով հսկայական դրամազույժ, կարողանում է զավառներում կրթօջախներ, արհեստանոցներ, ընթերցասրահներ, գրադարաններ բացել:

Ն. Վարժապետյանին հաջորդած Հարություն Վեհապետյանը և ապա Խորեն Աշրգյանը հայտնի էին որպես «սուլթանասեր» պատրիարքներ: Նրանք իրենց պատրիարքության շրջանում խուսափում են Ազգային ժողովում արևմտահայության համար կենսական խրնդիրներ բարձրացնելուց: Այդ մասին են վկայում Ազգային ժողովի ատենագրությունները: Բացի այդ, Ազգային ժողովի աշխատանքներն աստիճանաբար սկսում են կազմալուծվել, իսկ 1892 թ. թուրքական իշխանությունները նույնիսկ արգելում են տոնել սահմանադրության տարեդարձը, որով էլ ավելի են սեղմվում մի քանի տասնյակ տարիներ գոյություն ունեցող ազգային այս հաստատության առանց այն էլ սահմանափակ իրավունքները:

Եվրոպայում այդ օրերին ծավալված հայանպաստ շարժումից վախեցած Համիդը սկսում է սիրաշահել հայերին և թույլատրում է Ազգային ժողով գումարել նոր պատրիարք ընտրելու համար³: 1894 թ. Կ. Պոլսի պատրիարքական գահին է բազմում Մատթեոս եպ. Իզմիրլյանը, որն իր ազգասիրությամբ, անվեհեր հայրենասիրությամբ ու անկեղծությամբ կրկին ունկնդիր էր լինելու իր ազգի ցավերին: Սակայն Մ. Իզմիրլյանի պատրիարքության մեկ ու կես տարիներն ընդգրկում են համիդյան բռնապետության ամենաձանձր ժամանակահատվածը: «Համիդի շրջանին հինգ պատրիարքներ նստած են Պոլսոյ Պատրիարքական Աթոռին վրա, ու հինգին ալ կեցուածքը տարբեր է եղած դէպի Համիդ,- գրում է Հ. Միրունին,- Ն. Վարժապետեանի օրով Համիդի մէջ զազանը դեռ չէր հասունցած... Հ. Վեհապետեանի մօտ չորս տարուան պատրիարքութեան շրջանը շատ առիթներ չունեցաւ Համիդի կատաղութիւնը ճաշակելու: ...Խ. Աշրգեան երբ Աթոռ եկավ,

³ Աճառեան Հ., Տաճկահայոց հարցի պատմութիւնը, Նոր-Նախիջևան, 1915, էջ 24:

Համիդ արդեն մտած էր նույններու շրջանը... Մ. Բզմիրլեանին վիճակուած էր ճաշակել լեղին»⁴:

Մ. Բզմիրլյանի՝ Համիդի նկատմամբ «խրոխտ կեցվածքը» դուր չէր գալիս հայ էֆենդիներին, որոնք փորձում են ստիպել նրան փոխել իր քաղաքական ընթացքը: Հոգնած և ձանձրացած այդ ամենից՝ պատրիարքը հրաժարական է ներկայացնում: Բզմիրլյանի պատրիարքական գործունեությունը ժամանակակիցների կողմից արժանացել է տարաբնույթ, երբեմն էլ իրարամերժ գնահատականների: Որպես կանոն՝ պատրիարքների և ընդհանրապես հայ հասարակական-քաղաքական և հոգևոր գործիչների գործունեությունն արժևորվել է՝ ելնելով նրանց՝ Համիդի նկատմամբ ունեցած վերաբերմունքից: Ոմանց համար Բզմիրլյանը հաստատամիտ «երկաթյա պատրիարք» էր, սկզբունքային և իրավունքի պաշտպան, ոմանց համար էլ անհեռատես և կամակոր պաշտոնակալ: Փաստն այն է, որ այդ ծանր օրերին Մ. Բզմիրլյանը որդեգրեց «խրոխտ մնալ գազանին առջև» մարտավարությունը:

Ինչպես արդեն նշվել է, Ազգային ժողովի հոգևոր գործառույթներից էր նաև Ամենայն հայոց կաթողիկոսի ընտրության մասնակցությունը, որն ամրագրված էր սահմանադրության 60-րդ հոդվածով: Սակայն սույն հոդվածը հակասում էր 1836 թ. մարտի 11-ին ռուսաց Նիկոլայ Ա կայսեր ընդունած կանոնադրությանը (պատմության մեջ հայտնի է «Պոլոժենիե» անունով), որով պետք է առաջնորդվեր Հայոց եկեղեցին ռուսական կայսրության տարածքում: «Պոլոժենիեի» 13-րդ հոդվածը պահանջում էր, որ յուրաքանչյուր թեմ աշխարհիկ և հոգևոր մեկական պատգամավոր ուղարկի Էջմիածին՝ կաթողիկոսական ընտրություններին մասնակցելու համար: Նման ընտրակարգը չէր կարող ընդունվել արևմտահայության կողմից: Այդ իսկ պատճառով նրանք «Պոլոժենիեն» անվանում են ազգակործան օրենք⁵:

Ռուսաստանում պատրիարքական իշխանության ենթարկումը աշխարհիկ իշխանությանը տեղի էր ունեցել դեռևս Պետրոս Ա կայսեր կառավարման ժամանակ (1720 թ.): Ռուսաց պատրիարքներին այնուհետև ոչ թե ընտրում, այլ նշանակում էր ցարը⁶: Համադրելով Ռուսաստանում պատրիարքների՝ ցարի կողմից ուղղակիորեն նշանակվելու հանգամանքը և «Պոլոժենիեի» սկզբունքները՝ դժվար չէ նկատել, որ ցարն ընդամենը միջամտում էր Ամենայն հայոց կաթողիկոսի ընտրությունների գործընթացին և երկու առավելագույն քվեներ ստացած հոգևորականներից մեկին հռչակում կաթողիկոս՝ հետևելով նրա գործունեությանը: Կաթողիկոսի ընտրության հարցը հայության կենսական խնդիրներից էր, և սահմանադրական շրջանում արևմտահայությունն այդ ընտրություններին մասնակցում էր ամեն անգամ տարբեր ձևով, իսկ վերջնական ընտրական համակարգ մշակելու շուրջ համաձայ-

⁴ Միքունի Յ. Ճ., Օրմանեան և իր ժամանակը, Էջմիածին, թիվ Է, 1961, էջ 44:

⁵ Տե՛ս Օիլն Աւարայրի, 1866, թիվ Ա, էջ 16:

⁶ Տե՛ս Славянская энциклопедия, т. 2, М., 2001, с. 111.

նություն ձեռք բերել այդպես էլ չի հաջողվում: Միայն 1891 թ. թուրքական կառավարության կողմից Ազգային ժողովի նիստերի հրավիրման արգելումը մոռացության է տալիս մեծ վեճը, և Մակար կաթողիկոսի մահից հետո (1892 թ.) արևմտահայությունն առաջին անգամ կաթողիկոսական ընտրություններին մասնակցում է «Պոլոժենիեի» սկզբունքներով:

Ազգային ժողովը երկար տարիներ զբաղվում է նաև Երուսաղեմի միաբանության և ազգային իշխանությունների միջև առաջացած հակասությունների պարզաբանմամբ և դրանց կանոնակարգմամբ: Երուսաղեմի խնդիրը ծագում է Հովհաննես Զմյուռնացի պատրիարքի մահից հետո (1860 թ.), երբ միաբանությունը հրաժարվում է Ազգային ժողովի պատրաստած կանոնադրությունն ընդունել և «դուրսեն» պատրիարք ընտրել՝ սկիզբ դնելով «ներսեն-դուրսեն» պայքարին: Այդ պայքարն ավարտվում է, փաստորեն, «ներսենականների» հաղթանակով և Եսայի վարդ. Կարապետյանի Երուսաղեմի պատրիարք ընտրվելով (1864 թ.): Միաբանության և Կ. Պոլսի պատրիարքության հարաբերությունները կանոնակարգելու և հետագայում խոռովություններից խուսափելու համար Ազգային ժողովն ընդունում է Երուսաղեմի միաբանության կանոնագիրը (1865 թ. մարտի 19-ին), որում հստակեցվում էին միաբանության ընդհանուր ժողովի գործառնությունները, պատրիարքի ընտրության կարգը, միաբանների իրավունքներն ու պարտականությունները: Սույն կանոնագիրը բարեփոխվում է 1887 թվականին: Նման անհրաժեշտությունը թելադրված էր միաբանության ֆինանսական ծանր ճգնաժամով, որի հետևանքով կուտակվել էր մեծ քանակությամբ պարտք: Դրանց մի որոշ մասը վճարելու համար վաճառքի էին հանվել առանձին սրբավայրեր, իսկ մի մասն էլ հանգանակությամբ էր հավաքվել: Նոր կանոնագրում բարեփոխվել էին պատրիարքական իշխանությանը վերաբերող հոդվածները, հանվել էին կանոնագիրը վերաքննելու և պատրիարքին պաշտոնանկ անելու հոդվածները, սահմանափակվել փոխառություններ վերցնելու միաբանության իրավունքները՝ ապագայում նոր պարտքերից խուսափելու և սրբավայրերի անձեռնմխելիությունը պահպանելու համար:

Աղթամարի կաթողիկոսության խնդիրն Ազգային ժողովի օրակարգ է ներառվում, երբ վիճակային եկեղեցական ժողովը որոշում է ընդունում Աղթամարի Խաչատուր և Կիլիկիայի Նիկողայոս եպիսկոպոսներին կաթողիկոսներ չճանաչելու մասին (1866 թ. հուլիսի 22-ին), քանի որ նրանք իրենց պաշտոնը ստանձնել էին ապօրինի ճանապարհով: Կիլիկիայի կաթողիկոսական գահը 1731-1865 թթ. դարձել էր Աջապահյան տոհմի մենաշնորհը՝ տալով Աթոռին ժառանգական բնույթ: Մակայն Կիրակոս Բ (1855-1865 թթ.) կաթողիկոսի մահից հետո Աջապահյան տոհմից նոր կաթողիկոս չի ընտրվում, քանի որ Կ. Պոլսի պատրիարքը դեմ էր նման ժառանգական դրությանը և ցանկանում էր նոր կաթողիկոսին ընտրել Ազգային սահմանադրության սկզբունքներին համապատասխան: Դրա հետևանքով Կիրակոս Բ-ի մահից հետո հայությունը բաժանվում է երկու «կուսակցությունների»,

որոնցից մեկը ցանկանում էր առանց պատրիարքարանի միջամտության Նիկողայոս եպիսկոպոսին կաթողիկոս դարձնել, իսկ երկրորդները, ընդհակառակը, կողմ էին պատրիարքարանի վերահսկողությամբ կաթողիկոսական ընտրություններ անցկացնելուն: Միսն ալեկոծող խռովությունները հաջողվում է դադարեցնել միայն թուրքական կառավարության միջամտությամբ (1871 թ. օգոստոսի 14-ին)՝ կաթողիկոսական գահը զավթած Նիկողայոս եպիսկոպոսին Արմաշի վանք արքայապետելով: Իր հերթին Կիլիկիայի նորընտիր Մկրտիչ Քեֆսիգյան կաթողիկոսը, չենթարկվելով Ազգային ժողովի ընդունած որոշումներին, լքում է Միսր չցանկանալով գործել սահմանադրության սկզբունքների համաձայն և նրպատակ ունենալով Կիլիկիայի կաթողիկոսությունն ազգային միությունից առանձնացնել՝ չճանաչելով նաև Էջմիածնի կաթողիկոսի գերագահությունը: Աղթամարի եպիսկոպոս Խաչատուր Շիրոյանի անօրինական կաթողիկոս դառնալու հարցը նույնպես տասնյակ տարիներ Ազգային ժողովի օրակարգում էր: Իս. Շիրոյանը կաթողիկոս Պետրոս Բյուլբյուլի կենդանության օրոք իրեն օժել էր կաթողիկոս, ապա վարձու մարդասպանի միջոցով սպանել տվել վերջինիս: Այդ կնճիռը լուծելու համար կրկին միջամտում է Բ. Դուռը՝ Խաչատուր Շիրոյանին «ներողագիր» շնորհելով: Վերջինս շարունակում է իր ազգադավ գործունեությունը դեռ երկար տարիներ, իսկ նրա մահից հետո (1895 թ.) Աղթամարի կաթողիկոսական աթոռը թափուր է մնում: Սկզբում այն հանձնվում է Վանի նախկին առաջնորդական տեղապահ Արսեն վարդ. Մարգարյանին՝ կաթողիկոսական փոխանորդի տիտղոսով, այնուհետև Կ. Պոլսի պատրիարքարանի վերահսկողության ներքո կազմված տնօրեն խորհրդին:

Այսպիսով, Ազգային ժողովի գործունեությունից ակնկալվող փոփոխություններն իրավական առումով չկատարվեցին: Գործնականում լուծում չստացան Կիլիկիայի և Աղթամարի կաթողիկոսությունների շուրջ ծայր առած խնդիրները, իսկ Երուսաղեմի միաբանությանը պատկանող սրբավայրերի ամբողջականության պահպանմանն ուղղված միջոցառումները չտվեցին սպասված արդյունքը: Տեղի հոգևորականների անձնական շահադիտության փառասիրության պատճառով չճշգրտվեցին նույնիսկ Ազգային վարչության հետ այդ կառույցների հարաբերությունները: Ավելին, հակամարտություններն ազգային իշխանությունների և թեմականների միջև վերածվեցին մի անխմաստ պայքարի, որի հետևանքով տուժեց տեղի հայությունը:

ДУХОВНЫЕ ФУНКЦИИ НАЦИОНАЛЬНОГО СОБРАНИЯ ЗАПАДНЫХ АРМЯН

НУРБЕКЯН Л. З.

Резюме

Согласно национальной конституции западных армян, утвержденной в 1863 году, Национальное собрание являлось органом законодательной власти. Оно определяло направленность вопросов, имеющих национальную значимость. Велика была также роль константинопольских патриархов в решении общенациональных проблем.